

## ॥ कूष्माण्ड-होम-मन्त्राः ॥

यद्दे॒वा दे॒व॒हेळ॑नं॒ दे॒वा॑सश्च॒कृ॒मा व॒यम् । आदि॑त्या॒स्तस्मा॑न्मा  
मुश्च॑त॒र्तस्य॑र्तेन॒ मामि॑त॒ स्वाहा॑ ॥१॥

(दे॒वेभ्य॑ आदि॒त्येभ्य॑ इदं न मम)

दे॒वा जी॒वनका॑म्या॒ यद्वा॒चाऽनृ॑तमूदि॒म । तस्मा॑न्न॒ इ॒ह मु॑श्चत॒  
विश्वे॑ दे॒वाः स॒जोष॑सः॒ स्वाहा॑ ॥२॥

(वि॒श्वेभ्यो॑ दे॒वेभ्य॑ इदं न मम)

ऋ॒तेन॑ द्या॒वापृ॑थि॒वी ऋ॒तेन॑ त्व॒ सं॒रस्व॑ति । कृ॒तान्नः॑ पा॒ह्येन॑सो  
यत्किं॑ चा॒नृ॒तमूदि॑म॒ स्वाहा॑ ॥३॥

(द्या॒वापृ॑थि॒वीभ्यां॑ स॒रस्व॑त्या इदं न मम)

इ॒न्द्रा॒ग्नी मि॒त्रावरु॑णौ सोमो॑ धा॒ता बृ॒हस्प॑तिः । ते नो॑  
मुश्च॑न्त्वेन॑सो॒ यदन्य॑कृतमा॒रिम॒ स्वाहा॑ ॥४॥

(इ॒न्द्रा॒ग्निभ्यां॑ मि॒त्रावरु॑णाभ्यां॑ सोमा॒य धा॒त्रे बृ॒हस्प॑तय॒ इदं न मम)

स॒जा॒त॒श॒सा॒दुत॑ जा॒मिश॒सा॒ज्याय॑सः॒ श॒सा॒दुत॑ वा  
कनी॑यसः । अना॑धृष्टं दे॒वकृ॑तं॒ यदे॒न॒स्तस्मा॑त् त्वम॒स्माञ्जा॑तवे॒दो  
मुमु॑ग्धि॒ स्वाहा॑ ॥५॥

(अग्नये जातवेदस इदं न मम)

यद्वाचा यन्मनसा बाहुभ्यामुरुभ्यामष्टीवद्वा॑ शिश्रैर्यदनृतं  
चकृमा वयम्। अग्निर्मा तस्मादेनसो गार्हपत्यः प्रमुञ्चतु  
चकृम यानि दुष्कृता स्वाहा॥६॥

(अग्नये गार्हपत्याय इदं न मम)

येन त्रितो अर्णवान्निर्बभूव येन सूर्यं तमसो निर्मुमोच। येनेन्द्रो  
विश्वा अजहादरातीस्तेनाहं ज्योतिषा ज्योतिरानशान आक्षि  
स्वाहा॥७॥

(अग्नये ज्योतिष इदं न मम)

यत्कुसीदमप्रतीतं मयेह येन यमस्य निधिना चरामि।  
एतत्तदग्रे अनृणो भवामि जीवन्नेव प्रति तत्ते दधामि  
स्वाहा॥८॥

(अग्नय इदं न मम)

यन्मयि माता गर्भे सति। एनश्चकार यत्पिता। अग्निर्मा  
तस्मादेनसः। गार्हपत्यः प्र मुञ्चतु। दुरिता यानि चकृमा।  
करोतु मामनेनसुः स्वाहा॥९॥

(अग्नये गार्हपत्याय इदं न मम)

यदा॑ पि॒पे॒षं मा॒तरं॑ पि॒तरम्॑। पु॒त्रः प्रमु॑दितो॒ धयन्॑।  
अहि॑सि॒तौ पि॒तरौ॒ मया॒ तत्। तद॑ग्रे॒ अनृ॑णो भ॑वामि  
स्वाहा॑॥१०॥

(अग्नय इदं न मम)

यद॑न्तरि॒क्षं पृ॒थि॒वीमु॒त द्यां॑ यन्मा॒तरं॑ पि॒तरं॑ वा जिहि॑सि॒म॥  
अ॒ग्नि॒र्मा तस्मा॑दे॒नसः॑। गा॒र्हप॑त्यः प्र मु॑श्चतु। दुरि॒ता या॒नि  
चकृ॑म। क॒रोतु॒ माम॑ने॒नस॑ꣳ स्वाहा॑॥११॥

(अग्नये गार्हपत्याय इदं न मम)

यदा॑शसा॑ नि॒शसा॒ यत्प॑राशसा॑॥ यदे॒नश्च॑कृ॒मा नू॒तनं॑  
यत्प॑रा॒णम्। अ॒ग्नि॒र्मा तस्मा॑दे॒नसः॑। गा॒र्हप॑त्यः प्र मु॑श्चतु।  
दुरि॒ता या॒नि चकृ॑म। क॒रोतु॒ माम॑ने॒नस॑ꣳ स्वाहा॑॥१२॥

(अग्नये गार्हपत्याय इदं न मम)

अति॑ क्रामामि दुरि॒तं यदे॒नः। जहा॑मि रि॒प्रं प॑र॒मे सु॒धस्थे॑।  
यत्र॑ यन्ति॑ सु॒कृ॒तो नापि॑ दुष्कृ॒तः। तमा॑ रो॒हामि॑ सु॒कृ॒तां नु  
लो॒कꣳ स्वाहा॑॥१३॥

(अग्नय इदं न मम)

त्रि॒ते दे॒वा अ॑मृजतै॒तदे॒नः। त्रि॒त ए॒तन्म॑नु॒ष्येषु॑ मामृ॒जे। ततो॑

मा॒ यदि॒ किञ्चि॑दान॒शे। अ॒ग्नि॒र्मा॒ तस्मा॑दे॒न॒सः। गा॒र्ह॒प॒त्युः  
प्र मु॑ञ्चतु। दुरि॒ता या॒नि च॑कृ॒म। क॒रोतु॒ माम॑ने॒न॒स॒ꣳ  
स्वाहा॑॥१४॥

(अग्नये गार्हपत्याय इदं न मम)

दि॒वि जा॒ता अ॒प्सु जा॒ताः। या जा॒ता ओष॑धी॒भ्यः। अथो॒  
या अ॑ग्नि॒जा आपः॑। ता नः॑ शु॒न्धन्तु॒ शुन्ध॑नीः॒ स्वाहा॑॥१५॥

(अद्ध्यः शुन्धनीभ्य इदं न मम)

यदापो॑ न॒क्तं दुरि॑तं चरा॑म। यद्वा दि॒वा नू॒तनं॑ यत्पु॑रा॒णम्।  
हि॒र॒ण्यव॑र्णा॒स्तत॒ उत्पु॑नीत नः॒ स्वाहा॑॥१६॥

(अद्ध्यो हिरण्यवर्णाभ्य इदं न मम)

इ॒मं मे॑ वरु॒ण श्रु॑धी॒ हव॑म॒द्या च॑ मृ॒ळय। त्वा॒म॒व॒स्युरा॑च॒के  
स्वाहा॑॥१७॥

(वरुणाय इदं न मम)

तत्त्वा॑ या॒मि ब्र॒ह्म॑णा॒ वन्द॑मा॒न॒स्तदाऽऽशा॑स्ते॒ यज॑मा॒नो  
ह॒विर्भिः॑। अहे॑ळमा॒नो वरु॑णे॒ह बो॒द्ध्युरु॑श॒ꣳस॒ मा न॒ आयुः॑  
प्रमो॑षीः॒ स्वाहा॑॥१८॥

(वरुणाय इदं न मम)

त्वं नो अग्रे वरुणस्य विद्वान्देवस्य हेळोऽवं यासिसीष्टाः।  
यजिष्ठो वह्नितमः शोशुचानो विश्वा द्वेषांसि प्र  
मुमुग्ध्यस्मत्स्वाहा॥१९॥

(अग्नीवरुणाभ्याम् इदं न मम)

स त्वं नो अग्रेऽवमो भवोती नेदिष्ठो अस्या उषसो व्युष्टौ।  
अवं यक्ष्व नो वरुणं रराणो वीहि मृळीकं सुहवो न एधि  
स्वाहा॥२०॥

(अग्नीवरुणाभ्याम् इदं न मम)

प्र ण आयूँषि तारिषत् त्वमग्रे अयासि। अया सन्मनसा  
हितः। अया सन् हव्यमूहिषे। अया नो धेहि भेषजं  
स्वाहा॥२१॥

(अग्रये अयस इदं न मम)

यददीँव्यन्नृणमहं बभूवादिँथ्सन्वा सञ्जगर जनैँभ्यः। अग्निर्मा  
तस्मादिन्द्रश्च संविदानौ प्रमुञ्चतां स्वाहा॥२२॥

(इन्द्राग्निभ्याम् इदं न मम)

यद्धस्ताँभ्यां चकर किल्बिषाण्यक्षाणां वग्नुमुपजिघ्रमानः। उग्रं

प॒श्या च॑ रा॒ष्ट्रभृ॑च्च॒ तान्य॑प्स॒रसा॒वनु॑दत्तामृ॒णानि॒ स्वाहा॑॥ २३ ॥

(उग्रं-पश्य-राष्ट्रभृद्भ्याम् अप्सरोभ्याम् इदं न मम)

उ॒ग्रं प॒श्ये रा॒ष्ट्रभृ॑त्कि॒ल्विषा॑णि॒ यद॒क्षवृ॑त्तमनु॑दत्तमे॒तत्।  
ने॒त्रं ऋ॒णानृ॑णव॒ इत्थ॑स॒मानो॒ यम॑स्य॒ लो॒के अधि॑रञ्जु॒राय॒  
स्वाहा॑॥ २४ ॥

(उग्रं-पश्या राष्ट्रभृद्भ्याम् अप्सरोभ्याम् इदं न मम)

अ॒व॑ ते॒ हे॒डो वरु॑ण॒ नमो॑भि॒रव॑ य॒ज्ञेभि॑रीमहे ह॒विर्भिः॑।  
क्षय॑न्न॒स्मभ्य॑मसुर॒ प्रचे॑तो॒ राज॒न्नेना॑सि॒ शिश्र॑थः कृ॒तानि॑  
स्वाहा॑॥ २५ ॥

(वरुणाय इदं न मम)

उ॒दु॒त्त॒मं वरु॑ण॒ पाश॑म॒स्मदवा॑ध॒मं वि म॑ध्य॒मं श्र॑थाय। अथा॑  
व॒यमा॑दित्य॒ व्र॒ते तवा॑ना॒गसो॒ अदि॑तये॒ स्याम॒ स्वाहा॑॥ २६ ॥

(वरुणाय इदं न मम)

इ॒मं मे॑ वरु॑ण श्रु॒धी ह॒वम॑द्या च॒ मृळ॑य। त्वा॒मव॑स्यु॒राच॑के॒  
स्वाहा॑॥ २७ ॥

(वरुणाय इदं न मम)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो  
ह॒विर्भिः॑। अहे॑ळमानो वरु॒णेह॒ बो॒द्ध्युरु॑श॒स॒ मा न॒ आयुः॑  
प्रमो॑षीः स्वाहा॑॥ २८॥

(वरुणाय इदं न मम)

त्वं नो॑ अग्रे॒ वरु॑णस्य वि॒द्वान्दे॒वस्य॒ हेळोऽव॑ यासिसी॒ष्टाः।  
यजि॑ष्ठो॒ वह्नि॑तमः॒ शोशु॑चानो॒ विश्वा॒ द्वेषा॑सि॒ प्र  
मु॑मुग्ध्य॒स्मथ्स्वाहा॑॥ २९॥

(अग्नीवरुणाभ्याम् इदं न मम)

स त्वं नो॑ अग्रेऽव॒मो भ॑वोती नेदि॑ष्ठो अ॒स्या उ॒षसो॒ व्यु॑ष्टौ।  
अव॑ यक्ष्व नो॒ वरु॑ण॒ररा॑णो वी॒हि मृ॑ळी॒क॒सुह॑वो न एधि॒  
स्वाहा॑॥ ३०॥

(अग्नीवरुणाभ्याम् इदं न मम)

सङ्कु॑सुको॒ विकु॑सुको॒ निर्ऋ॒थो यश्च॑ निस्व॒नः।  
तेऽ(१)स्मद्य॑क्ष्ममना॑गसो दू॒रादूर॑म॒चीच॑त॒स्व॒ स्वाहा॑॥ ३१॥

(सङ्कुसुक विकुसुक निर्ऋथ निस्वनेभ्य इदं न मम)

निर्य॑क्ष्ममचीचते कृ॒त्यां निर्ऋ॑तिं च। तेन॒ योऽ(१)स्मथ्स॑मृच्छा॒तै

तमस्मै प्रसुवामसि स्वाहा॥३२॥

(निर्ऋत्या इदं न मम) [अप उपस्पृश्य]

दुःश॑स॒सानु॑श॒स॒साभ्यां॑ घ॒णेना॑नुघ॒णेन॑ च। तेना॒न्योऽ(१)स्म॑त्समृ॒च  
तमस्मै प्रसुवामसि स्वाहा॥३३॥

(दुःश॑स॒सानु॑श॒स॒स-घ॒णेना॑नुघ॒णेभ्य इदं न मम)

सं वर्च॑सा॒ पय॑सा॒ सन्त॑नूभि॒रग॑न्महि॒ मन॑सा॒ स॒ शिवे॑न।  
त्वष्टा॑ नो॒ अत्र॑ विद॑धातु रा॒योऽनु॑मार्ष्टु त॒न्वो(१) यद्वि॑लि॒ष्टः  
स्वाहा॥३४॥

(त्वष्ट॑ इदं न मम)

आयु॑ष्टे वि॒श्वतो॑ दध॒दय॑म॒ग्निर्वरे॑ण्यः। पुन॑स्ते प्रा॒ण आया॑ति  
परा॑यक्ष्म॒ सुवा॑मि ते॒ स्वाहा॥३५॥

(वरे॑ण्यायाग्रय इदं न मम)

आ॒युर्दा॑ अ॒ग्ने ह॒विषो॑ जुषा॒णो घृ॑तप्र॒तीको॑ घृ॒तयो॑निरेधि।  
घृ॒तं पी॒त्वा मधु॑ चा॒रु ग॒व्यं पि॒तेव॑ पु॒त्रम॒भिर॑क्षतादि॒मः  
स्वाहा॥३६॥

(आयु॑र्दे अग्रय इदं न मम)



इ॒मम॑ग्र॒ आयु॑षे॒ वर्च॑से कृ॒धि ति॒ग्ममो॑जो॒ वरु॑ण॒ स॒ शि॑शाधि।  
मा॒तेवा॑स्मा॒ अदि॑ते॒ शर्म॑ यच्छु॒ विश्वे॑ देवा॒ जर॑दष्टि॒र्यथा॑-  
ऽस॒त्स्वाहा॑॥ ३७ ॥

(अ॒ग्निवरु॑णादि॒ति-वि॒श्वेभ्यो॑ दे॒वेभ्य॑ इ॒दं न॑ मम)

अ॒ग्र॒ आयू॑र॒षि पव॑सु॒ आ सु॒वोर्ज॑मि॒षं च॑ नः। आ॒रे बा॑धस्व  
दु॒च्छु॒नाऽ॒ स्वाहा॑॥ ३८ ॥

(अ॒ग्रये॑ पव॒मानाय॑ इ॒दं न॑ मम)

अ॒ग्ने पव॑स्व॒ स्वपा॑ अ॒स्मे वर्चः॑ सु॒वीर्य॑म्। दध॑द्र॒यिं मयि॑ पोष॒ऽ॒  
स्वाहा॑॥ ३९ ॥

(अ॒ग्रये॑ पव॒मानाय॑ इ॒दं न॑ मम)

अ॒ग्निर्ऋ॑षिः॒ पव॑मानः॒ पाञ्च॑जन्यः॒ पुरो॑हि॒तः। तमी॑महे  
महा॒ग॒यऽ॒ स्वाहा॑॥ ४० ॥

(पाञ्च॑जन्याय॒ अ॒ग्रय॑ इ॒दं न॑ मम)

अ॒ग्ने जा॒तान्प्र॑णु॒दा नः॑ सु॒पत्नान्प्र॑त्यजा॒ताञ्जा॑तवे॒दो नु॑दस्व।  
अ॒स्मे दी॑दिहि सु॒मना॒ अहे॑ळ॒च्छर्म॑न्ते स्याम त्रि॒वरू॑थ उ॒द्धौ  
स्वाहा॑॥ ४१ ॥

(अग्रये जातवेदस इदं न मम)

सहसा जा॒तान्प्रणु॑दा नः स॒पत्नान्प्रत्यजा॑ता॒जातवे॑दो नुदस्व।  
अधि॑ नो ब्रूहि सुमन॒स्यमा॑नो व॒यं स्या॑म॒ प्रणु॑दा नः  
स॒पत्नान्स्वाहा॑॥४२॥

(अग्रये जातवेदस इदं न मम)

अग्रे॒ यो नोऽभि॑तो॒ जनो॒ वृको॒ वारो॒ जिघा॑सति। तां॑ स्त्वं  
वृ॒त्रहं॑ जहि॒ वस्व॒स्मभ्य॒माभ॑र॒ स्वाहा॑॥४३॥

(अग्रय इदं न मम)

अग्रे॒ यो नोऽभि॑दास॑ति समा॒नो यश्च॑ नि॒ष्ठ्यः। तं व॒यं स॒मिधं॑  
कृ॒त्वा तुभ्य॑म॒ग्रेऽपि॑ द॒ध्मसि॑ स्वाहा॑॥४४॥

(अग्रय इदं न मम)

यो नः॑ श॒पाद॑श॒पतो॒ यश्च॑ नः॑ श॒पतः॑ श॒पात्। उ॒षाश्च॑ तस्मै॑  
नि॒मृक्क॒ सर्वं॑ पा॒पं स॒मूह॑तां॒ स्वाहा॑॥४५॥

(उषो निमृग्भ्याम् इदं न मम)

यो नः॑ स॒पत्नो॒ यो र॒णो॒ मर्तो॑ऽभि॒दास॑ति दे॒वाः। इ॒ध्मस्यै॑व  
प्र॒क्षाय॑तो॒ मा तस्यो॑च्छे॒षि किं॑ च॒न स्वाहा॑॥४६॥

(अग्रय इदं न मम)

यो मां द्वेष्टि॑ जा॒तवे॒दो यं चा॒हं द्वेष्टि॑ यश्च॒ माम्। सर्वा॑ऽस्ता॒न॒ग्रे  
स॒न्द॒ह॒ या॑ऽश्चा॒हं द्वेष्टि॑ ये च॒ मा॑ऽ स्वाहा॑॥४७॥

(अग्रय इदं न मम)

यो अ॒स्मभ्य॑म॒राती॒याद्यश्च॑ नो॒ द्वेष॑ते॒ जनः॑। नि॒न्दा॒द्यो  
अ॒स्मान्दि॒प्सा॑च्च॒ सर्वा॑ऽस्ता॒न्म॑ष्म॒षा कुरु॑ स्वाहा॑॥४८॥

(अग्रय इदं न मम)

स॒ःशितं॑ मे॒ ब्रह्म॒ स॒ःशितं॑ वी॒र्या(१)॑म्बलम्। स॒ःशितं॑ क्ष॒त्रं  
मे॒ जि॒ष्णु॒ यस्या॒हमस्मि॑ पु॒रोहि॑तः॒ स्वाहा॑॥४९॥

(ब्रह्मण इदं न मम)

उ॒देषां॑ बा॒हू अ॑ति॒र॒मुद्व॑र्चो॒ अथो॒ बल॑म्। क्षि॒णोमि॑  
ब्रह्म॑णा॒ऽमित्रा॑नु॒न्नयामि॑ स्वा(१)म् अ॒हः॑ स्वाहा॑॥५०॥

(अग्रय इदं न मम)

पुन॑र्म॒नः पुन॑रायु॒र्म आ॒गात्पुन॑श्चक्षुः पुनः॒ श्रोत्रं॑ म॒ आ॒गात्पुनः॑  
प्रा॒णः पुन॑राकू॒तं म॒ आ॒गात्पुन॑श्चित्तं पुन॒राधी॑तं म॒ आ॒गात्।  
वै॒श्वान॑रो मेऽद॒ब्धस्त॑नूपा अव॑बाधतां दुरि॒तानि॑ वि॒श्वा  
स्वाहा॑॥५१॥

(अग्नये वैश्वानराय इदं न मम)

॥ बोधायन-मतानुसारेण अष्टौ होममन्त्राः ॥

सि॒ःहे व्या॒घ्र उ॒त या पृ॒दा॑कौ। त्विषि॑र॒ग्नौ ब्रा॑ह्म॒णे सूर्ये॑ या।  
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना  
स्वाहा॑॥१॥

(त्विष्यै देव्या इदं न मम)

या रा॑ज॒न्ये दु॒न्दुभा॑वाय॒तायाम्। अश्व॑स्य॒ क्रन्द्ये॑ पु॒रुष॑स्य  
मा॒यौ। इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा  
संविदा॒ना स्वाहा॑॥२॥

(त्विष्यै देव्या इदं न मम)

या ह॒स्तिनि॑ द्वी॒पिनि॒ या हि॑र॒ण्ये। त्विषि॑र॒श्वेषु॑ पु॒रुषेषु॑  
गोषु॑॥१६॥ इन्द्रं॑ या दे॒वी सु॒भगा॑ ज॒जान॑। सा न॒  
आग॑न्वर्चसा संविदा॒ना स्वाहा॑॥३॥

(त्विष्यै देव्या इदं न मम)

रथे॑ अ॒क्षेपु॑ वृष॒भस्य॑ वाजे॑। वाते॑ प॒र्जन्ये॑ वरु॒णस्य॑ शु॒ष्मे।  
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना

स्वाहा॥४॥

(त्विष्यै देव्या इदं न मम)

अग्ने॑ऽभ्यावर्ति॑न्न॒भि न आ व॑र्तस्वायु॑षा॒ वर्च॑सा स॒न्या मे॒धया॑  
प्र॒जया॒ धने॑न॒ स्वाहा॑॥५॥

(अग्नये अभ्यावर्तिन इदं न मम)

अग्ने॑ अङ्गिरः॑ श॒तं ते॑ स॒न्त्वावृ॑तः स॒हस्रं॑ त उपा॒वृ॒तः। तासां॑  
पोष॑स्य॒ पोषे॑ण॒ पुन॑र्नो न॒ष्टमा॑ कृ॒धि पुन॑र्नो र॒यिमा॑ कृ॒धि  
स्वाहा॑॥६॥

(अग्नये अभ्यावर्तिन इदं न मम)

पुन॑रूर्जा॒ नि व॑र्तस्व॒ पुन॑र॒ग्न इ॒षायु॑षा। पुन॑र्नः पाहि वि॒श्वतः॑  
स्वाहा॑॥७॥

(अग्नये अभ्यावर्तिन इदं न मम)

स॒ह र॒य्या नि व॑र्तस्वाग्ने॒ पिन्व॑स्व॒ धार॑या। वि॒श्वप्ति॑न्ना॒या  
वि॒श्वत॑स्परि॒ स्वाहा॑॥८॥

(अग्नये अभ्यावर्तिन इदं न मम)

## ॥ उपस्थान-मन्त्राः ॥

(तैत्तिरीयारण्यकम् २-६)

वैश्वान॒राय॑ प्र॒तिवे॑दयामो॒ यदी॑नृ॒णः॑ सङ्ग॒रो दे॒वता॑सु। स  
 ए॒तान्पा॑शा॒न् प्र॒मुच॑न् प्रवे॒द् स नो॑ मु॒ञ्चातु॑ दु॒रिता॑दव॒द्यात्।  
 वैश्वान॒रः प॒व॒यान्नः॑ प॒वित्रै॒र्यथ्सङ्ग॑र॒म॒भिधा॑वा॒म्याशा॑म्।  
 अना॑जान॒न्मन॑सा॒ याच॑मानो॒ यदत्रै॑नो॒ अव॒ तथ्सु॑वामि।  
 अ॒मी ये सु॒भगे॑ दि॒वि वि॒चृतौ॑ नाम॒ तार॑के। प्रे॒हामृ॑तस्य  
 यच्छ॑तामे॒तद्व॒द्धक॑मोच॑नम्। वि॒जिही॑र्ष्व लो॒कान्कृ॑धि  
 ब॒न्धान्मु॑ञ्चासि॒ बद्ध॑कम्। योने॑रिव॒ प्रच्यु॑तो॒ गर्भः॑ सर्वा॑न्  
 प॒थो अ॑नुष्व। स प्र॑जा॒नन्प्र॑तिगृ॒णीत॑ वि॒द्वान्प्र॑जाप॑तिः  
 प्रथ॑म॒जा ऋ॒तस्य॑। अ॒स्माभि॑र्दत्तं ज॒रसः॑ प॒रस्ता॑दच्छि॒न्नं  
 तन्तु॑मनु॒सञ्चरे॑म॥१॥

त॒तं तन्तु॑मन्वे॒के अनु॑ सञ्च॑रन्ति॒ येषां॑ द॒त्तं पि॒त्र्यमा॑य॒नव॑त्।  
 अ॒ब॒न्ध्वे॒के द॑द॒तः प्र॑यच्छा॒द्दातुं॑ चेच्छ॒क्रवा॑ः॒सः स्व॑र्ग ए॒षाम्।  
 आ॒र॒भेथा॑मनु॒ सः॒र॒भेथा॑ः॒ समानं॑ प॒न्था॑मवथो घृ॒तेन॑। यद्वा॑  
 पूर्तं॑ प॒रिवि॑ष्टं॒ यद॒ग्नौ तस्मै॑ गो॒त्राये॑ह जा॒याप॑ती॒ सः॒र॒भेथा॑म्।  
 यद॒न्तरि॑क्षं पृथि॒वीमु॑त द्यां यन्मा॒तरं॑ पि॒तरं॑ वा जिहि॑ः॒सिमा॑।

अ॒ग्नि॒र्मा॒ तस्मा॒देन॑सो॒ गार्ह॑पत्य॒ उन्नो॑ नेषद्वुरि॒ता या॒नि  
च॒कृ॒म। भू॒मि॒र्मा॒ताऽदि॑तिर्नो॒ ज॒नि॒त्रं भ्रा॒ताऽन्तरि॑क्षम॒भि॒श॑स्त  
ए॒नः। द्यौर्नः॑ पि॒ता पि॑तृयाच्छं भ॒वासि॑ जा॒मि मि॒त्वा मा  
वि॑वि॒थ्सि लो॒कात्। यत्र॑ सु॒हार्दः॑ सु॒कृतो॑ म॒द॒न्ते वि॒हाय॑ रोगं  
त॒न्वा(१)॥ स्वा॒या॒म्। अ॒श्लो॒णाङ्गैर॑हु॒ताः स्व॒र्गे तत्र॑ पश्येम  
पि॒तरं॑ च पु॒त्रम्। यद॒न्नम॑द्यन्तेन दे॒वा दा॒स्यन्न॑दा॒स्यन्नु॑त  
वा॑ करि॒ष्यन्। यद्दे॒वानां॑ चक्षु॒ष्या॒गो अ॒स्ति यदे॒व किं  
च॑ प्रतिज॒ग्राह॑म॒ग्नि॒र्मा तस्मा॑दनृ॒णं कृ॑णोतु। यद॒न्नम॑न्नि  
बहु॒धा वि॒रूपं॑ वा॒सो हि॒र॒ण्यमु॑त गा॒म॒जा॒मवि॑म्। यद्दे॒वानां॑  
चक्षु॒ष्या॒गो अ॒स्ति यदे॒व किं च॑ प्रतिज॒ग्राह॑म॒ग्नि॒र्मा  
तस्मा॑दनृ॒णं कृ॑णोतु। य॒न्मया॑ म॒न॒सा वा॒चा कृ॑त॒मे॒नः  
कदा॒चन। सर्व॑स्मा॒त्तस्मा॑न्मेळि॒तो मो॒ग्धि॒ त्वं हि वे॒त्थ  
यथा॑त॒थम्॥